

妙法蓮華經憂波提舍

妙法蓮華經憂波提舍

大乘論師婆藪槃豆釋

後魏北天竺三藏菩提留支共沙門曇林等譯

序 7

序品 8

 A01 序分成就 9

 B01 示現諸法門中最勝義成就 9

 B02 示現自在功德義成就 9

 A02 衆成就..... 9

 B01 數成就..... 10

 B02 行成就..... 10

C01 諸聲聞修小乘行 10

 D01 上上起門 11

 D02 總別相門 13

 D03 攝取事門 14

C02 諸菩薩修大乘行 16

 D01 上支下支門 17

 D02 攝取事門 18

C03 諸菩薩神通自在，隨時示現，能修行大乘。 19

C04 出家聲聞威儀一定不同菩薩 20

B03 攝功德成就 20

B04 威儀如法住成就	20
A03 如來欲說法時至成就	21
A04 依所說法威儀隨順住成就	24
A05 依止說因成就	25
A06 示現大眾現前欲聞法成就	27
A07 文殊師利菩薩答成就	29
B01 大義因成就	29
B02 現見世間名字章句意甚深因成就	31
B03 現見希有因成就	31
B04 現見勝妙因成就	31

B05 現見受用大因成就 32

B06 現見攝取一切諸佛轉法輪因成就..... 32

B07 現見善堅實如來法輪因成就..... 32

B08 現見能進入因成就 33

B09 現見憶念因成就 33

B10 現見自身所經事因成就 33

方便品..... 34

示現所說法因果相 37

妙法功德具足 38

如來法師功德成就 41

示現三種義說 49

示現四種事說 50

如來說法為斷四種疑心 57

譬喻品..... 59

七種具足煩惱染性衆生 61

七種譬喻對治七種增上慢心 62

三種無煩惱人三種染慢 64

三種平等對治此三種染慢 65

與諸聲聞授記 66

法力..... 73

持力..... 75

修行力..... 75

序

頂禮正覺海	淨法無爲僧	爲深利智者	開示毘伽典
祇虔牟尼尊	及菩薩聲聞	令法自他利	略出勒伽辯
歸命過末世	現在佛菩薩		
弘慈降神力	願施我無畏	大悲止四魔	護菩提增長

妙法蓮華經

序品

如是我聞：一時佛住王舍城耆闍崛山中，與大比丘衆萬二千人俱，皆是阿羅漢，諸漏已盡、無復煩惱、心得自在、善得心解脫、善得慧解脫、心善調伏；人中大龍、應作者作、所作已辦、離諸重擔、逮得己利、盡諸有結、善得正智心解脫、一切心得自在、到第一彼岸。

菩薩摩訶薩八萬人，皆於阿耨多羅三藐三菩提不退轉，皆得陀羅尼、大辯才樂說、轉不退轉法輪、供養無量百千諸佛、於諸佛所種諸善根、常爲諸佛之所稱歎、以大慈悲而修身心、善入佛慧、通達大智、到於彼岸，名稱普聞無量世界、能度無數百千衆生。

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

此經法門，初第一品示現七種功德成就。何等爲七？

(1)序分成就、(2)衆成就、(3)如來欲說法時至成就、(4)依所說法威儀隨順住成就、(5)依止說因成就、(6)大衆現前欲聞法成就、(7)文殊師利菩薩答成就。

A01 序分成就

此法門中示現二種勝義成就，此義應知。何等爲二？

B01 示現諸法門中最勝義成就

B02 示現自在功德義成就

如王舍城勝於一切諸餘城舍，耆闍崛山勝餘諸山，顯此法門最勝義故。

如經「婆伽婆住王舍城耆闍崛山中」。

A02 衆成就

有四種義故成就示現。何等爲四？

(1)數成就、(2)行成就、(3)攝功德成就、(4)威儀如法住成就。

B01 數成就

諸大衆無數故。

B02 行成就

有四種：

C01 諸聲聞修小乘行

皆是阿羅漢等有十六句，示現聲聞功德成就。

聲聞功德成就者，彼十六句，三門攝義示現。

何等三門？(1)上上起門，(2)總別相門，(3)攝取事門。

D01 上上起門

- (1) 諸漏已盡故，名爲阿羅漢。
- (2) 以心得自在故，名爲諸漏已盡。
- (3) 以無復煩惱故，名爲心得自在。
- (4) 以善得心解脫、善得慧解脫故，名爲心得自在。
- (5) 以遠離能見所見故，名爲無復煩惱。
- (6) 以善得心解脫、善得慧解脫故，名爲心善調伏。
- (7) 人中大龍者，行諸惡道如平坦路，無所拘礙。
- (8) 應行者已行，應到處已到故，應作者作。
- (9) 人中大龍，已得對治降伏煩惱之怨敵故。

- (10)所作已辦者，更不後生，如相應事已成就故。
- (11)離諸重擔者，以應作者作，所作已辦，後生重擔已捨離故。
- (12)逮得己利者，已捨重擔，證涅槃故。
- (13)盡諸有結者，以逮得己利，斷諸煩惱因故。
- (14)善得正智心解脫者，諸漏已盡故。
- (15)一切心得自在者，善知見道修道智故。
- (16)到第一彼岸者，善得正智心解脫，善得神通無諍三昧等諸功德故。
- (17)大阿羅漢等者，心得自在，到彼岸故。
- (18)衆所知識者，諸王王子、大臣人民、帝釋天王、梵天王等，皆識知故。
- (19)聲聞菩薩佛等是勝智者，彼勝智者皆悉善知，是故名爲衆所知識。

D02 總別相門

總句：皆是阿羅漢。

別句：彼阿羅漢，名之爲應，有十五種應義。何等十五：

- (1)應受飲食臥具供養恭敬等故；
- (2)應將大眾教化一切故；
- (3)應入聚落城邑等故；
- (4)應降伏諸外道等故；
- (5)應以智慧速觀察法故；
- (6)應不疾不遲說法，如法相應，不疲倦故；
- (7)應靜坐空閑處，飲食衣服一切資生，不積不聚，少欲知足故；

- (8)應一向行善行，不著諸禪故；
- (9)應行空聖行故；
- (10)應行無相聖行故；
- (11)應行無願聖行故；
- (12)應降伏世間禪淨心故；
- (13)應起諸通勝功德故；
- (14)應證第一義勝功德故；
- (15)應如實知同生諸衆得諸功德，爲利益一切諸衆生故。

D03 攝取事門

此十五句，攝取十種功德，示現可說果、不可說果故。何等爲十：

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

- (1) 攝取斷德功德。如經「諸漏已盡，無復煩惱。」
- (2) 攝取諸功德。
 1. 降伏世間功德。如經「心得自在」。
 2. 降伏出世間學人功德。如經「善得心解脫、善得慧解脫。」
- (3) 攝取不違功德，隨順如來教作故，如經「心善調伏」。
- (4) 攝取勝功德。如經「人中大龍」。
- (5) 攝取所應作勝功德。所應作者，謂能依法供養恭敬尊重如來。如經「應作者作」。
- (6) 攝取滿足功德。滿足學地故，如經「所作已辦」。
- (7) 攝取過功德。

- 1.過愛。如經「離諸重擔」。
- 2.過求命供養恭敬。如經「逮得己利」。
- 3.過上下界。已過學地故，如經「盡諸有結」。
- (8)攝取上上功德。如經「善得正智心解脫」。
- (9)攝取應作利益衆生功德。如經「一切心得自在」。
- (10)攝取上首功德。如經「到第一彼岸」。

C02 諸菩薩修大乘行

皆於阿耨多羅三藐三菩提不退轉等，有十三句，示現菩薩功德成就。

菩薩功德成就者，彼十三句，二門攝義示現。

何等二門：(1)上支下支門，(2)攝取事門。

D01 上支下支門

總相：皆於阿耨多羅三藐三菩提不退轉。

別相：彼不退轉十種示現。何等爲十：

(1)住聞法不退轉。如經「皆得陀羅尼」。

(2)樂說不退轉。如經「大辯才樂說」。

(3)說不退轉。如經「轉不退轉法輪」。

(4)依止善知識不退轉。以身心業依色身攝取故。

如經「供養無量百千諸佛」、「於諸佛所種諸善根」。

(5)斷一切疑不退轉。如經「常爲諸佛之所稱歎」。

(6)爲何等何等事說法，入彼彼法不退轉。如經「以大慈悲而修身心」。

- (7)入一切智如實境界不退轉。如經「善入佛慧」。
- (8)依我空法空不退轉。如經「通達大智」。
- (9)入如實境界不退轉。如經「到於彼岸」。
- (10)作所應作不退轉。如經「能度無數百千衆生」。

D02 攝取事門

示現諸菩薩住何等清淨地中，以何等方便，於何等境界中，作所應作故。

清淨者，八地已上三地，無相行寂靜清淨故。

方便者，有四種：

- (1)攝取妙法方便。住持妙法，以樂說力，爲人說故。
- (2)攝取善知識方便。以依善知識，作所應作故。

(3)攝取衆生方便。以不捨衆生故。

(4)攝取智方便。以教化衆生，令入彼智故。

又復，更有攝取事門示現諸地攝取勝功德，不同二乘諸功德故，謂：

(1)第八地中，無功用智，不同下上故。

不同下者，下功用行，不能動故。

不同上者，上無相行不能動，自然而行故。

(2)第九地中，得勝進陀羅尼門，具足四無礙自在智故。

(3)第十地中，不退轉法輪，得受佛位，如轉輪王之太子故，以得同攝功德義故。

C03 諸菩薩神通自在，隨時示現，能修行大乘。

如毘陀波羅菩薩等十六大賢士，具足菩薩不可思議事，而常示現種種形相，謂優婆塞、優婆夷、比丘、比丘尼等。

C04 出家聲聞威儀一定不同菩薩

B03 攝功德成就

示現依何處、依何心、依何智、依何等境界行、依何等能辦。

(1)依何處者，依善知識故。

(2)依何心者，依教化衆生心，畢竟利益一切衆生故。

(3)依何智者，依三種智： 1.授記密智； 2.諸通智； 3.真實智。

(4)依何等境界行、依何等能辦者，即三種智所攝應知。

B04 威儀如法住成就

四種示現。何等爲四：(1)衆圍繞，(2)前後，(3)供養恭敬，(4)尊重讚歎。

如經「爾時世尊，四衆圍繞，供養恭敬、尊重讚歎。」

A03 如來欲說法時至成就

爲諸菩薩說大乘經故。此大乘修多羅有十七種名，顯示甚深功德。

何等十七？云何顯示？

(1)名無量義經者，成就字義故。以此法門，說彼甚深法妙境界故。

彼甚深法妙境界者，諸佛如來最勝境界故。

(2)名最勝修多羅者，於三藏中，最勝妙藏。此法門中，善成就故。

(3)名大方廣經者，無量大乘門中，善成就故。隨順衆生根，住持成就故。

(4)名教菩薩法者，以爲教化根熟菩薩。隨順法器，善成就故。

- (5)名佛所護念者，以依如來，有此法故。
- (6)名一切諸佛祕密法者，此法甚深，唯佛知故。
- (7)名一切諸佛之藏者，如來功德三昧之藏，在此經故。
- (8)名一切諸佛祕密處者，以根未熟衆生等非受法器，不授與故。
- (9)名能生一切諸佛經者，聞此法門，能成諸佛大菩提故。
- (10)名一切諸佛之道場者，以此法門，能成諸佛阿耨多羅三藐三菩提，非餘修多羅故。
- (11)名一切諸佛所轉法輪者，以此法門，能破一切諸障礙故。
- (12)名一切諸佛堅固舍利者，謂如來真實法身，於此修多羅，不敗壞故。
- (13)名一切諸佛大巧方便經者，依此法門，成大菩提已，爲衆生說天人聲聞辟

支佛等諸善法故。

(14)名說一乘經者，以此法門，顯示如來阿耨多羅三藐三菩提究竟之體，彼二乘道非究竟故。

(15)名第一義住者，以此法門，即是諸佛如來法身究竟住處故。

(16)名妙法蓮花經者，有二種義。何等二種：

1.出水義。

以不可盡，出離小乘泥濁水故。

又，如彼蓮花出於泥水，喻諸聲聞得入如來大眾中坐，如諸菩薩坐蓮花上，聞說如來無上智慧清淨境界，得證如來深密藏故。

2.花開義。

以諸衆生，於大乘中，其心怯弱，不能生信。是故開示諸佛如來淨妙法身，令生信心故。

(17)名最上法門者，攝成就故。攝成就者，攝取無量名句字身，有頻婆羅阿闍婆等舒盧迦故。

此十七句法門是總，餘句是別。如經「爲諸菩薩說大乘經，名無量義。」如是等。

A04 依所說法威儀隨順住成就

示現依何等、何等法、說法，依三種法故。

(1)依三昧成就。三昧成就，二種示現：

1.成就自在力，身心不動故。

2.離一切障，隨自在力故。此自在力，復有二種：

①為隨順衆生，不見對治攝取覺菩提分法故。

②為對治無量世來堅執煩惱故。

如經「佛說此經已，結加趺坐，入於無量義處三昧，身心不動。」如是等故。

(2)依器世間。

(3)依衆生世間。震動世界，及知過去無量劫事，如是等故。

如經「是時天雨曼陀羅花，次第乃至歡喜合掌，一心觀佛。」

A05 依止說因成就

為諸大衆，示現異相不思議事。

大眾見已，生希有心，渴仰欲聞，生如是念：「如來今者，應為我說。」故名依止說因成就。

是故如來放大光明，示現他方諸世界中種種諸事故。

先為大眾示現外事六種震動等，次為示現此法門中內證甚深微密之法。

又，依器世間眾生世間，數種種、量種種，具足煩惱差別，具足清淨差別，佛法弟子差別，示現三寶故。

復乘差別，有世界有佛，有世界無佛，令眾生見修行者未得果，得道者已得果。如經「諸修行、得道者。」

數種種者，示現種種觀故，略說四種觀：(1)食，(2)聞法，(3)修行，(4)樂。如經「爾時，佛放眉間白毫相光，次第乃至以佛舍利起七寶塔。」

行菩薩道者，教化衆生依四攝法，方便攝取。如經「當自攝取」。

A06 示現大衆現前欲聞法成就

問一人者，多人欲聞，生希有心，是故唯問文殊師利。如是示現世尊弟子隨順於法，不相違故。

今佛世尊現神變相者，爲何等義？爲說大法故，現大相以爲說因。

現大相者，爲說妙法蓮花經故，現大瑞相。爲說如來所得妙法不可思議等文字章句故。

有二種義，是故仰推文殊師利。何等爲二：(1)現見諸法故。(2)離諸因緣，唯自內心成就彼法故。

示現種種諸瑞相者，以爲示現彼彼事故。如彼事相，現沒住滅。

以文殊師利能記彼事故，以文殊師利所作成就，因果成就，現見彼法故。

所作成就者，此有二種：(1)功德成就，(2)智慧成就。

因成就者，一切智成就故。

又復有因，謂緣因故。緣因成就者，衆相具足故。

果成就者，說大法故。

種種異異佛國土者，爲此示現彼國土中種種異異差別。

淨妙國土者，謂無煩惱衆生住處。如經「照於東方萬八千世界，次第乃至悉見彼佛國界莊嚴。」

如來爲上首者，諸菩薩等依如來住故。以彼如來，於彼國土諸大衆中，得自在故，如經「又見彼土現在諸佛」，如是等故。

A07 文殊師利菩薩答成就

聖者文殊師利以宿命智，現見過去因相、果相、成就十事如現在前，是故能答彌勒菩薩。

云何現見過去因相？謂文殊師利自見己身，曾於彼彼諸國土中，處處修行種種行事故。

云何現見過去果相？謂文殊師利自見己身，是過去世妙光菩薩，於彼佛所聞此法門，為衆生說故。

何等名為成就十事：

B01 大義因成就

八句示現。何等為八：

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

- (1)欲論大法。 (2)欲雨大法雨。 (3)欲擊大法鼓。 (4)欲建大法幢。
(5)欲然大法燈。 (6)欲吹大法螺。 (7)欲不斷大法鼓。(8)欲說大法。

此八句欲示現如來欲論大法等故。何等名爲八種大義？謂：

- (1)有疑者，爲斷疑故。
(2)已斷疑者，增長淳熟彼智身故。
(3)根淳熟者，爲說二種微密境界：1.聲聞微密境界，2.菩薩微密境界。
(4)大法鼓者二句，示現以遠聞故。
(5)入密境界者，令彼進取上上清淨義故。
(6)進取上上清淨義者，令彼進取一切種智，得現見故。
(7)令彼進取一切種智得現見者，爲一切法建立名字章句義故。

(8)建立名字章句義者，令人不可說證智轉法輪故。

B02 現見世間名字章句意甚深因成就

如經「我於過去諸佛，曾見此瑞。次第乃至故現斯瑞。」

B03 現見希有因成就

以無量時不可得故。

不可思議不可稱不可量者，示現過彼阿僧祇劫不可得故。

又復示現五種劫故，所謂(1)夜、(2)晝、(3)月、(4)時、(5)年。

示現無量無邊諸法故，如經「如過去無量無邊不可思議阿僧祇劫，爾時，有佛號日月燈明。次第乃至令得阿耨多羅三藐三菩提，成一切種智。」

B04 現見勝妙因成就

示現諸佛及諸菩薩自受用故。如經「次復有佛，亦名日月燈明。次第乃至所可說法，初中後善。」

B05 現見受用大因成就

是時王子受勝妙樂，各捨出家。復彼大眾，於爾許時，心不疲倦故。

如經「其最後佛，未出家時，次第乃至佛授記已，便於中夜入無餘涅槃。」

B06 現見攝取一切諸佛轉法輪因成就

法輪不斷故。

如經「佛滅度後，妙光菩薩持妙法蓮花經，滿八十小劫，爲人演說。」

B07 現見善堅實如來法輪因成就

佛滅度後，無量時說故。如經「日月燈明佛八子，皆師妙光。次第乃至皆令

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

堅固阿耨多羅三藐三菩提心。」

B08 現見能進入因成就

彼諸王子得大菩提故。如經「是諸王子，次第乃至皆成佛道。」

B09 現見憶念因成就

爲他說法，利益他故。

如經「其最後成佛者，名曰然燈。次第乃至尊重讚歎。」

B10 現見自身所經事因成就

以自身受勝妙樂故。如經「彌勒當知，次第乃至佛所護念。」

汝號求名者，示現知彼過去事故。

又復示現今得彼法皆具足故。

又，依義攝三故：

- (1)與說故。如經「今佛世尊欲說大法」等。
- (2)成如實說故。如經「我於過去曾見」等。
- (3)令待說故。如經「諸人今當知」等。

自此已下，示現所說法因果相。

方便品

爾時，世尊入甚深三昧，正念不動，以如實智觀。

從三昧安詳而起，起已，即告尊者舍利弗言：

舍利弗！諸佛智慧甚深無量。其智慧門，難見、難覺、難知、難解、難入。

如來所證，一切聲聞、辟支佛等所不能知。何以故？

舍利弗！如來應正遍知，已曾親近供養無量百千萬億無數諸佛；於百千億那由他佛所，盡行諸佛所修阿耨多羅三藐三菩提法。

舍利弗！如來已於無量百千億那由他劫勇猛精進，所作成就，名稱普聞。

舍利弗！如來畢竟成就希有之法。

舍利弗！難解之法，如來能知。

舍利弗！難解法者，諸佛如來隨宜所說，意趣難解，一切聲聞辟支佛等所不能知。何以故？

舍利弗！諸佛如來自在說因成就故。

舍利弗！如來成就種種方便、種種知見、種種念觀、種種言辭。

舍利弗！吾從成佛已來，於彼彼處廣演言教，無數方便引導衆生，於諸著處

令得解脫。

舍利弗！如來知見方便到於彼岸。

舍利弗！如來知見廣大深遠，無障無礙，力無所畏，不共法，根力菩提分禪定解脫三昧三摩跋提，皆已具足。

舍利弗！諸佛如來深入無際，成就一切未曾有法。

舍利弗！如來能種種分別巧說諸法，言辭柔軟，悅可衆心。

止，舍利弗！不須復說。

舍利弗！佛所成就第一希有難解之法，舍利弗！唯佛與佛說法，諸佛如來能知彼法究竟實相。

舍利弗！唯佛如來知一切法。舍利弗！唯佛如來能說一切法。何等法、云何

法、何似法、何相法、何體法、何等云何、何似何相何體，如是等一切法，如來現見，非不現見。

示現所說法因果相

爾時，世尊入甚深三昧，正念不動，以如實智觀。從三昧安詳而起，起已，即告舍利弗者，示現如來得自在力故。

如來入定，無能驚寤故。

何故唯告尊者舍利弗，不告其餘聲聞等者，隨深智慧與如來相應故。

何故不告諸菩薩者，有五種義：

- (1) 爲諸聲聞所應事故。
- (2) 爲諸聲聞迴心趣向大菩提故。

- (3)護諸聲聞恐怯弱故。
- (4)爲令餘人善思念故。
- (5)爲諸聲聞不起所作已辦心故。

妙法功德具足

諸佛智慧甚深無量者，爲諸大衆生尊重心，畢竟欲聞如來說故。

言甚深者，顯示二種甚深之義。何等爲二：

- (1)證甚深，謂諸佛智慧，甚深無量故。
- (2)阿含甚深，謂智慧門，甚深無量故。

言甚深者，此是總相，餘別相。

證甚深者，有五種示現：

(1)義甚深。謂依何等義甚深故。

(2)實體甚深。

(3)內證甚深。

(4)依止甚深。

(5)無上甚深。

何者甚深，謂大菩提。大菩提者，如來所證阿耨多羅三藐三菩提故。

云何甚深，一切聲聞辟支佛等所不能知，故名甚深。

言智慧者，謂一切種一切智義故。如經「諸佛智慧，甚深無量。其智慧門，難見、難覺、難知、難解、難入，一切聲聞、辟支佛等所不能知。」

阿含甚深者，八種示現：

- (1)受持讀誦甚深。如經「已曾親近供養無量百千萬億無數諸佛」。
- (2)修行甚深。如經「於百千萬億那由他佛所，盡行諸佛所修阿耨多羅三藐三菩提法。」
- (3)果行甚深。如經「舍利弗！如來已於無量百千億那由他劫，勇猛精進，所作成就。」
- (4)增長功德心甚深。如經「名稱普聞」。
- (5)快妙事心甚深。如經「舍利弗！如來畢竟成就希有之法。」
- (6)無上甚深。如經「舍利弗！難解之法，如來能知。」
- (7)入甚深。入甚深者，名字章句意難得故。自以住持，不同外道說因緣法，名為甚深。如經「舍利弗！難解法者，諸佛如來隨宜說法，意趣難解。」

(8)不共聲聞辟支佛所作住持甚深。如經「一切聲聞辟支佛等所不能知。」如是已說妙法功德具足。

如來法師功德成就

如來法師功德成就。如經「何以故？舍利弗！諸佛如來自在說因成就。」

如來成就四種功德故，能度衆生，何等爲四：

(1)住成就。

如經「舍利弗！如來成就種種方便。」種種方便者，謂從兜率天中退沒，乃至示現入涅槃故。

(2)教化成就。

如經「種種知見」。種種知見者，示現染淨諸因故。

(3)功德畢竟成就。

如經「種種念觀」。種種念觀者，以說彼法成就因緣，如法相應故。

(4)說成就。

如經「種種言辭」。種種言辭者，以四無礙智，依何等何等名字章句，隨何等何等衆生能受而爲說故。

又復有義，種種方便者，

種種方便示現外道所有邪法，如是如是種種過失故。

種種方便示現諸佛所有正法，如是如是種種功德故。

如經「舍利弗！吾從成佛已來，廣演言教，無數方便引導衆生，於諸著處令得解脫。」。

又，無數方便者，方便令入諸善法故。

又，方便者，斷諸疑故。

又，方便者，令入增上勝智中故。

又，方便者，依四攝法，攝取衆生，令得解脫故。

諸著處者，彼處處著，或著諸界，或著諸地，或著諸分，或著諸乘。

著諸界者，謂著欲色無色界故。

著諸地者，謂著界故。依於三昧，取禪定地，謂初禪地，乃至非想非非想地，及取滅盡定地等故。

著諸分者，謂著在家出家分故。著在家分者，著己同類，作種種業，邪見等故。著出家分者，著名聞利養，種種覺煩惱等故。

著諸乘者，著聲聞乘、菩薩乘故。

著聲聞乘者，樂持小乘戒，求須陀洹、斯陀含、阿那含、阿羅漢等故。

著大乘者，謂著利養供養恭敬等故。著分別觀種種法相，乃至佛地故。

又復，種種知見者，自身成就不可思議勝妙境界，與諸聲聞菩薩等故。如經「舍利弗！如來知見方便到於彼岸。」到彼岸者，勝餘一切諸菩薩故。

又復，種種念觀者，如經「舍利弗！如來知見，廣大深遠，無障無礙，力無所畏，不共法，根力菩提分，禪定解脫三昧三摩跋提，皆已具足。」

又，

第一成就，可化衆生，依善知識而成就故。

第二成就，根熟衆生，令得解脫故。

第三成就，力家自在淨降伏故。

第四成就，復有七種：

- (1)種種成就。如經「舍利弗！諸佛如來深入無際，成就一切未曾有法。」
- (2)言語成就。謂得五種美妙音聲言語說法。如經「如來能種種分別巧說諸法，言辭柔軟，悅可衆心。」
- (3)相成就。如經「止，舍利弗！不須復說故。有法器衆生，心已滿足。」
- (4)堪成就。所有一切可化衆生，皆知如來成就希有勝功德，能說法故。如經「舍利弗！佛所成就第一希有難解之法。」
- (5)無量種成就。說不可盡。如經「舍利弗！唯佛與佛說法，諸佛如來能知彼法究竟實相。」言實相者，謂如來藏法身之體。不變義故。

(6)覺體成就。如來所說一切諸法，唯佛如來自證得故。如經「舍利弗！唯佛如來知一切法。」

(7)隨順眾生意，為說修行法成就。彼法何等，如是等故，如經「舍利弗！唯佛如來能說一切法。」

第一種種法門攝取眾生意，第二令不散亂住故，第三令取故，第四令得解脫故，第五令彼修行成就得對治法故，第六令彼修行進趣成就故，第七令得修行不退失故。此七種法，為諸眾生意身所作善成就故。

又與教化令成就者，與二種法令彼成就。何等為二：(1)與證法，(2)與說法。

(1)與證法令成就者，謂依證法而授與故。

(2)與說法令成就者，謂依說法而說與故。

此二種法如向前說，依此二法，有何次第而得修行，即彼前文重說。

又，依證法復有五種：(1)何等法，(2)云何法，(3)何似法，(4)何相法，(5)何體法故。

(1)何等法者，謂聲聞法、辟支佛法、諸佛法故。

(2)云何法者，謂起種種諸事說故。

(3)何似法者，依三種門得清淨故。

(4)何相法者，謂三種義一相法故。

(5)何體法者，無二體故。無二體者，謂無量乘，唯一佛乘，無二乘故。

又復有義：

(1)何等法者，所謂有爲、無爲法等。

(2)云何法者，謂因緣法、非因緣法等。

(3)何似法者，所謂常法、無常法等。

(4)何相法者，謂生等三相法、不生等三相法。

(5)何體法者，謂五陰體、非五陰體故。

又，何似法者，謂無常法、有爲法、因緣法。

又，何相法者，謂可見相等法。

又，何體法者，所謂五陰能取可取。以五陰是苦集體故。又，五陰者，是道諦體故。

復有異義，依說法說。

(1)何等法者，所謂名句字身等故。

- (2)云何法者，謂依如來所說法故。
- (3)何似法者，謂能教化可化者故。
- (4)何相法者，依音聲取，以依音聲取彼法故。
- (5)何體法者，謂假名體，法相義故。

示現三種義說

自此已下，次依示現三種義說：(1)決定義。(2)疑義。(3)依何事疑義。

- (1)決定義者，有聲聞方便得證深法，作決定心。於聲聞道中，得方便涅槃證故。如是二種證法，示現有為無為法故。如經「爾時，大眾中有諸聲聞漏盡阿羅漢，次第乃至亦得此法，到於涅槃。」
- (2)疑義者，謂諸聲聞辟支佛等不能得知，是故生疑。如經「而今不知是義所

趣」。

- (3)依何事疑義者，聞如來說聲聞解脫，與我解脫，不異不別，是故生疑。謂生疑者，生因中疑：「此事云何」。此事云何，此以如來數數為說甚深境界，前說甚深，後說甚深，不同聲聞，以如是故生疑，如經「爾時，舍利弗知四眾心疑。次第乃至而說偈言。」

示現四種事說

自此以下，次依示現，四種事說：(1)決定心，(2)因授記，(3)取授記，(4)與授記。

- (1)決定心。已生驚怖者，令斷驚怖。

以為利益二種人故，是故如來有決定心。此驚怖者，五種應知：

1. 損驚怖。謂小乘衆生，如所聞聲，取以爲實。謗無大乘，起如是心：「如來說言：阿羅漢果，究竟涅槃，我畢竟取如是涅槃。」是故，羅漢不入涅槃。如是驚怖。
2. 多事驚怖。謂大乘衆生，聞菩薩道，劫數長遠，種種苦行，起如是心：「佛道長遠，我於無量無邊劫中行菩薩行，久受勤苦。」如是念故，生驚怖心。以是故，起取異乘心，如是驚怖。
3. 顛倒驚怖。謂心分別有我我所種種身，見諸不善法，如是驚怖。
4. 心悔驚怖。謂大德舍利弗等，起如是心，言：「我不應修證如是小乘之法。」如是悔已，心即自止。即此心悔，名爲驚怖。
5. 誑驚怖。謂增上慢聲聞之人，起如是心：「云何如來誑於我等」。如是

驚怖。

(2)因授記者，如經「止，止，舍利弗！不須復說。若說是事，一切世間諸天人等皆生驚怖。」此因授記，皆生驚怖者，有三種義：

- 1.欲令彼諸大眾推求甚深妙境界故。
- 2.欲令彼諸大眾生尊重心，畢竟欲聞如來說故。
- 3.欲令諸增上慢聲聞之人，捨離法座，而起去故。

第二請者，示現過去無量諸佛教化眾生。如經「是會無數，次第乃至聞佛所說，則生敬信。」

第三請者，示現今佛教化眾生。如經「今此會中，如我等比，次第乃至長夜安隱，多所饒益。」

- (3)取授記者，以舍利弗等欲得授記。如經「佛告舍利弗：汝已三請，豈得不說！汝今諦聽。」如是等。
- (4)與授記者，六種應知：未聞令聞、說、依何等義、令住、依法、遮。
- 1.未聞者令聞，如經「舍利弗！如是妙法，諸佛如來時乃說之，如優曇鉢花。」如是等。
 - 2.說者，如經「舍利弗！我以無數方便，種種因緣譬喻言辭演說諸法。」如是等。種種因緣者，所謂三乘。彼三乘者，唯有名字章句言說，非有實義，以彼實義不可說故。
 - 3.依何等義者，如經「舍利弗！諸佛世尊唯以一大事因緣故出現於世。」如是等。一大事者，依四種義，應當善知，何等為四：

- ①無上義。唯除如來一切智知，更無餘事。如經「欲開佛知見，令衆生知，得清淨故，出現於世。」佛知見者，如來能證，以如實知彼深義故。
- ②同義。謂諸聲聞辟支佛佛法身平等。如經「欲示衆生佛知見故，出現於世。」法身平等者，佛性法身無差別故。
- ③不知義。謂諸聲聞辟支佛等不能知彼真實處故。此言不知真實處者，不知究竟唯一佛乘故。如經「欲令衆生悟佛知見故，出現於世。」
- ④令證不退轉地，示現欲與無量智業故。如經「欲令衆生入佛知見故，出現於世。」

又復，示者，爲諸菩薩有疑心者，令知如實修行故。

又，悟入者，未發心者令發心故，已發心者令入法故。

又復，悟者，令外道衆生生覺悟故。

又復，入者，令得聲聞小乘果者入菩提故。

4.令住者，如經「舍利弗！但以一佛乘故，爲衆生說法。」

5.依法者，如經「舍利弗！過去諸佛以無量無數方便，種種譬喻、因緣、念觀、方便說法，是法皆爲一佛乘。」如是等。

言譬喻者，如依牛故得有乳、酪、生酥、熟酥，及以醍醐。此五味中，醍醐第一。小乘不如，其猶如乳；大乘爲最，猶如醍醐。此喻所明大乘無上，諸聲聞等亦同大乘無上義故。

聲聞同者，此中示現諸佛如來法身之性，同諸凡夫聲聞之人辟支佛等，

法身平等，無差別故。此義皆是譬喻示現因緣之義，如前所說。

言念觀者，小乘諦中，人無我等；大乘諦中，真如實際法界法性，及人無我、法無我等種種觀故。

言方便者，於小乘中，觀陰界入，厭苦離苦，得解脫故；於大乘中，諸波羅蜜以四攝法攝取自身他身，利益對治法故。

6. 遮者，如經「舍利弗！十方世界中，尚無二乘，何況有三。」如是等。無二乘者，謂無二乘所得涅槃，唯有如來證大菩提。究竟滿足一切智慧名大涅槃。非諸聲聞辟支佛等有涅槃法，唯一佛乘故。一佛乘者，依四種義說，應當善知。

如來依此六種授記，是故前說：何等法、云何法、何似法、何相法、何體

法，如是示現。

(1)何等法者，謂未曾聞故。

(2)云何法者，謂種種言辭譬喻顯說故。

(3)何似法者，所謂唯為一大事故。

(4)何相法者，為隨眾生器說諸佛法故。

(5)何體法者，所謂唯有一乘體故。一乘體者，所謂諸佛如來平等法身。彼諸聲聞辟支佛乘非彼平等法身之體，以因果行觀不同故。

如來說法為斷四種疑心

自此以下，如來說法，為斷四種疑心。何等四疑：(1)疑何時說，(2)疑云何知是增上慢人，(3)疑云何堪說，(4)疑云何如來不成妄語。

(1)何時說者，諸佛如來，於何等時，起種種方便說法。

爲斷此疑，如經「舍利弗！諸佛出於五濁惡世，所謂劫濁。」如是等。

(2)云何知是增上慢人者，如來不爲增上慢人而說諸法。

云何知彼是增上慢？爲斷此疑，如經「若有比丘，實得阿羅漢者，若不信是法，無有是處。」如是等。

(3)云何堪說者，從佛聞法而起謗心，如來應是不堪說人。

云何不成不堪說人？爲斷此疑，如經「除佛滅度後現前無佛。」如是等。

(4)云何如來不成妄語者，此以如來，先說法異，今說法異。

云何如來不成妄語？爲斷此疑，如經「舍利弗！汝等應當一心信解受持佛語，諸佛如來言無虛妄，無有餘乘，唯一佛乘。」

「乃至童子戲，聚沙爲佛塔，如是諸人等，皆已成佛道。」者，謂發菩提心行菩薩行者，所作善根，能證菩提；非諸凡夫及決定聲聞本來未發菩提心者之所能得。如是乃至小低頭等，皆亦如是。

譬喻品

尊者舍利弗所說偈言：

金色三十二 十力諸解脫 同共一法中 而不得此事

八十種妙好 十八不共法 如是等功德 而我皆已失

此偈示現何義？尊者舍利弗自呵責身言：「我不見諸佛，不往諸佛所，及聞佛說法，不供養恭敬諸佛，無利益衆生事，於未得法退。」

尊者舍利弗作如是等呵責自身：

不見佛者，示現不見諸佛如來大人之相，不生恭敬供養心故。

往佛所者，示現教化衆生力故。

放金色光明者，示現見佛自身異身獲得無量諸功德故。

聞說法者，示現能作一切衆生之利益故。

力者，示現衆生有疑，依十種力，斷彼疑故。

供養者，示現能教化衆生力故。

十八不共法者，示現遠離諸障礙故。

恭敬者，示現出生無量福德，依如來教，得解脫故。

以人無我及法無我，一切諸法悉皆平等，是故尊者舍利弗自呵責身言：「我未得如是法故，於未得中退故。」

自此以下，次爲七種具足煩惱染性衆生說七種喻，對治七種增上慢心。此義應知。

又復，次爲三種染慢無煩惱人，三昧解脫身等染慢，對治此故說三種平等，此義應知。

七種具足煩惱染性衆生

何者七種具足煩惱染性衆生：

- (1) 求勢力人，
- (2) 求聲聞解脫人，
- (3) 大乘人，
- (4) 有定人，

- (5)無定人，
- (6)集功德人，
- (7)不集功德人。

七種譬喻對治七種增上慢心

何等七種增上慢心，云何七種譬喻對治：

- (1)顛倒求諸功德增上慢心。謂世間中諸煩惱染熾然增上，而求天人勝妙境界有漏果報。對治此故，為說火宅譬喻。
- (2)聲聞一向決定增上慢心。自言「我乘與如來乘，等無差別。」如是倒取。對治此故，為說窮子譬喻。
- (3)大乘一向決定增上慢心。起如是意：「無別聲聞辟支佛乘」。如是倒取。

對治此故，爲說雲雨譬喻。

(4)實無謂有增上慢心。以有世間三昧三摩跋提，實無涅槃，生涅槃想。如是倒取。對治此故，爲說化城譬喻。

(5)散亂增上慢心。實無有定，過去雖有大乘善根，而不覺知。不覺知故，不求大乘。狹劣心中，生虛妄解，謂第一乘。如是倒取。對治此故，爲說繫寶珠譬喻。

(6)實有功德增上慢心。聞大乘法，取非大乘。如是倒取。對治此故，爲說輪王解自髻中明珠與之譬喻。

(7)實無功德增上慢心。於第一乘不曾修集諸善根，本聞第一乘，心中不取，以爲第一。如是倒取。對治此故，爲說醫師譬喻。

第一人者，示世間中種種善根三昧功德方便令喜，然後令入大涅槃故。

第二人者，以三爲一，令入大乘故。

第三人者，令知種種乘，諸佛如來平等說法，隨諸衆生善根種子而生芽故。

第四人者，方便令入涅槃城故。涅槃城者，所謂諸禪三昧城故。過彼城已，
然後令入大涅槃城故。

第五人者，示其過去所有善根，令憶念已，然後教令入三昧故。

第六人者，說大乘法，以此法門同十地行滿，諸佛如來密與授記故。

第七人者，根未淳熟，爲令熟故，如是示現得涅槃量。

爲是義故，如來說七種譬喻。

三種無煩惱人三種染慢

何者三種無煩惱人三種染慢？所謂三種顛倒信故。何等爲三：

- (1)信種種乘異，
- (2)信世間涅槃異，
- (3)信彼此身異。

三種平等對治此三種染慢

爲對治此三種染慢故，說三種平等。

何者名爲三種平等？云何對治？

- (1)乘平等，謂與聲聞，授菩提記。唯一大乘，無二乘故。是乘平等，無差別故。
- (2)世間涅槃平等，以多寶如來入於涅槃。世間涅槃，彼此平等，無差別故。

(3)身平等。多寶如來已入涅槃，復示現身。自身他身法身平等，無差別故。如是三種無煩惱人染慢之心，見彼此身所作差別，不知彼此佛性法身悉平等故。謂即此人我證此法故，彼人不得此對治故。

與諸聲聞授記

問彼聲聞等，為實成佛故與授記，為不成佛與授記耶？若實成佛，菩薩何故於無量劫修集無量種種功德？若不成佛，云何與之虛妄授記？

答彼聲聞等得授記者，得決定心，非謂聲聞成就法性如來。依彼三種平等說一乘法，以佛法身、聲聞法身，平等無異，故與授記。非即具足修行功德，是故菩薩功德具足，諸聲聞人功德未足。

言授記者六處示現，五是佛記，一菩薩記。

如來記者，謂舍利弗、大迦葉等衆所知識，名號不同，故別與記。

富樓那等五百人，千二百等，同一名故，俱時與記。學無學等，皆同一號。

又復，非是衆所知識故同與記。

如來與彼提婆達多授別記者，示現如來無怨惡故。

與比丘尼及諸天女授佛記者，示現女人、在家、出家修菩薩行，皆證佛果，故與授記。

菩薩記者，如下不輕菩薩品中，示現應知。禮拜讚歎，作如是言：「我不輕汝，汝等皆當得作佛。」者。示現衆生皆有佛性。

言聲聞人得授記者，聲聞有四種：(1)決定聲聞，(2)增上慢聲聞，(3)退菩提心聲聞，(4)應化聲聞。

二種聲聞如來授記：謂應化者、退已還發菩提心者。

若決定者、增上慢者二種聲聞，根未熟故，不與授記。

菩薩與授記者，方便令發菩提心故。

又，依何義，佛說三乘名爲一乘？

依同義故，授諸聲聞大菩提記。言同義者，以佛法身聲聞法身，彼此平等，無差別故。

以諸聲聞辟支佛等乘不同，故有差別，以彼二乘非大乘故。如來說言不離我身是無上義，一切聲聞辟支佛等二乘法中不說此義，以其不能如實解故。以是義故，諸菩薩等行菩薩行，非爲虛妄。無上義者，自餘經文明無上義。無上義者，略有十種。何等爲十：

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

- (1) 示現種子無上故，說雨譬喻。汝等所行是菩薩道者，謂發菩提心，退已還發者，前所修行，善根不滅，同後得果故。
- (2) 示現行無上故，說大通智勝如來本事等。
- (3) 示現增長力無上故，說商主譬喻。
- (4) 示現令解無上故，說繫寶珠譬喻。
- (5) 示現清淨國土無上故，示現多寶如來塔。
- (6) 示現說無上故，說解髻中明珠譬喻。
- (7) 示現教化衆生無上故，地中踊出無量菩薩摩訶薩等。
- (8) 示現成大菩提無上故，示現三種佛菩提故：
 1. 示現應佛菩提，隨所應見而爲示現。如經「皆謂如來出釋氏宮，去伽耶

城不遠，坐於道場，得成阿耨多羅三藐三菩提。」

2.示現報佛菩提，十地行滿足，得常涅槃證故。如經「善男子！我實成佛已來，無量無邊百千萬億那由他劫。」

3.示現法佛菩提，謂如來藏性淨涅槃，常恆清涼，不變等義。如經「如來如實知見三界之相，次第乃至不如三界見於三界。」

三界相者，謂衆生界即涅槃界，不離衆生界有如來藏故。

無有生死，若退若出者，謂常恆清涼不變義故。

亦無在世及滅度者，謂如來藏真如之體，不即衆生界，不離衆生界故。

非實非虛，非如非異者，謂離四種相。有四種相者，是無常故。

不如三界見於三界者，謂佛如來能見能證真如法身，凡夫不見故。是故

經言：「如來明見，無有錯謬故。」

我本行菩薩道，今猶未滿者，以本願故，衆生界未盡，願非究竟故。

言未滿，非謂菩提不滿足也。

所成壽命復倍上數者，此文示現如來命常善巧方便顯多數故，過上數量不可數知。

我淨土不毀，而衆見燒盡者，報佛如來真實淨土，第一義諦之所攝故。

(9)示現涅槃無上故，說醫師譬喻。

(10)示現勝妙力無上故，自餘經文示現應知。

多寶如來塔，示現一切佛土清淨者，示現諸佛實相境界中，種種諸寶間錯莊嚴故。示現有八：(1)塔，(2)量，(3)略，(4)住持，(5)示現無量佛，(6)離穢，(7)多

寶，(8)同一塔坐。

(1)塔者，示現如來舍利住持故。

(2)量者，方便示現一切佛土清淨莊嚴，是出世間清淨，無漏善根所生，非是世間有漏善根之所生也。

(3)略者，示現多寶佛身，一體攝取一切諸佛真法身故。

(4)住持者，示現諸佛如來法身自在力故。

(5)示現無量佛者，示現彼此所作諸業無差別故。

(6)遠離穢者，示現一切諸佛國土平等清淨故，

(7)多寶者，示現一切諸佛國土同實性故。

(8)同一塔坐者，示現化佛非化佛，法佛報佛等皆為成大事故。

自此已下，示現法力、持力、修行力應知。

法力

法力者，五門示現：證門、信門、供養門、聞法門、讀誦持說門。

彌勒菩薩品中示現四門，常精進菩薩品中示現一門。

彌勒菩薩品中四法門者：

(1)證門。如經「我說是如來壽命長遠時，六百八十萬億那由他恆河沙等衆生得無生法忍。」

此言無生法忍者，所謂初地證智。

八生乃至一生得阿耨多羅三藐三菩提者，謂證初地菩提法故。

八生一生者，謂諸凡夫決定能證初地故，隨力隨分，八生乃至一生皆證初

地故。

此言阿耨多羅三藐三菩提者，以離三界分段生死，隨分能見真如法性，名得菩提，非謂究竟滿足如來方便涅槃也。

- (2)信門。如經「復有八世界微塵數衆生皆發阿耨多羅三藐三菩提心」。
- (3)供養門。如經「是諸菩薩摩訶薩得大法利時，於虛空中雨曼陀羅花。」如是等。
- (4)聞法門，如隨喜品所說。

常精進菩薩品中，一法門者，謂讀誦解說書寫等，得六根清淨。如經「若善男子善女人受持法華經，若讀、若誦、若解說、若書寫，是人當得八百眼功德，次第乃至得千二百意功德。」

此得六根清淨者，謂諸凡夫以經力故，得勝根用。未入初地菩薩正位，此義應知。如經「以父母所生清淨肉眼，見于三千大千世界。」如是等。

又。六根清淨者，於一一根中悉能具足，見色聞聲辨香別味覺觸知法，諸根互用，此義應知。

眼所見者，聞香能知。如經「釋提桓因在勝殿上五欲娛樂，乃至說法。」

聞香知者，此是知境，以鼻根知故。

持力

持力者，有三法門示現持力，如法師品、安樂行品等廣說。持力如經應知。

其心決定知水必近者，受持此經，得佛性水，成阿耨多羅三藐三菩提故。

修行力

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道

修力者五門示現：說力、行苦行力、護衆生諸難力、功德勝力、護法力。

(1)說力者，有三法門，神力品示現：

- 1.出廣長舌，令憶念故。
- 2.謂警歎聲，說偈令聞故。令聞聲已，如實修行，不放逸故。
- 3.彈指覺悟衆生，令修行者得覺悟故。

(2)行苦行力者，藥王菩薩品示現。

又，行苦行力者，妙音菩薩品，示現教化衆生故。

(3)護衆生諸難力者，觀世自在菩薩品、陀羅尼品示現。

(4)功德勝力者，妙莊嚴王品示現。二童子依過去世功德善根，有如是力故。

(5)護法力者，普賢菩薩品及後品示現。

又言「受持觀世自在菩薩名號，若人受持六十二億恆河沙等諸佛名號。」福德等者，有二種義：信力故、畢竟知故。

(1)信力者，有二種：

1.我身如彼觀世自在無異，畢竟信故。

2.謂於彼生恭敬心，如彼功德，我亦如是畢竟得故。

(2)畢竟知者，謂能決定知法界故。言法界者，名爲法性。彼法性者，名爲一切諸佛菩薩平等法身。平等身者，眞如法身，初地菩薩乃能證入，是故受持六十二億恆河沙等諸佛名號，有能受持觀世自在菩薩名號，所得功德無差別。

第一序品，示現七種功德成就。

第二方便品，有五分示現，破二明一。

餘品如向處分，易解。

妙法蓮華經憂波提舍